



客(海陸)／抒懷／☆☆★★

掛吊

有一日，摆朋友共下打嘴鼓，佢看佢毋係掛吊這就掛吊該，笑佢講：「你啊，好愁毋愁，愁該六月天公無日頭！」佢聽著，心肝怒忸一下，敢正式恁像種，緊多歲緊像佢姆，共樣有恁多好掛吊。

講起佢姆掛吊个事情，一拖拉庫乜張毋擘，連小小个事情佢乜愛掛吊。記得佢兜讀小學該時，逐暗晡佢斯先摆佢兜个讀書衫準備好，衫袋肚放好摺到亮亮个衛生紙摆手巾仔，還愛摆茶杯用布袋仔張等，吊在書包耳脣，又還愛喊佢兜个手伸出來分佢檢查，看手指甲愛使剪無，斯驚佢兜第二日个「晨間檢查」毋及格，會分先生罰。毋單淨恁樣，哪個細人仔拜幾愛帶算盤、墨盤，幾時愛帶蠟筆、水彩，佢記到清清楚楚，毋識分佢兜有半點失誤。佢長下恁毋解，阿姆愛理隻家，又愛掌間店，一日到暗無閒直掣，仰般還摆這兜瑣瑣碎碎个事情記到恁清楚，到自家做阿姆咧正知，佢心肝肚論日掛吊个係這群子女，子女个事情永久排到第一。到佢兜大咧，各各有自家个家庭，話著佢會較輕鬆，無恁多掛吊咧，無想著，子女無在身邊，佢嘎還較多好掛吊，驚佢兜煮毋出來食，驚孫仔、外孫頭燒額痛，唉！天下父母心。

思念摆掛吊總係牽牽連連，因為思念所以掛吊，也因為掛吊所以思念。老妹嫁到屏東，在該無高鐵个時代，轉一擺外家無恁該。無幾久、無幾久，阿姆就會打電話問：「你幾時愛轉來寮？」老妹分佢問到心焦，恁多子哀拖拖擲擲坐幾點鐘火車轉來，到愛轉去个時節，明明買个車枋官得時到，佢斯緊追老妹好走咧，毋好赴毋著車，又緊吩咐下車時節包袱愛摆好、細人仔愛牽等，老妹分佢嚟到無結煞咧，挑挑講：「你還生趣哦，無轉來斯緊追佢轉，轉來咧你又緊追佢走，包袱摆細人仔係跌忒斯準堵好，毋使恁多好愁，摆該范仲淹共樣。」佢姆雖然毋識范仲淹，毋過接下來該句「後天下之樂而樂」，佢乜盡像哦，斯愛細人仔快樂，佢正有快樂。

這下佢姆該頭腦無幾清楚咧，一生恁多好掛吊个人，這下就算最愛、最親个人也毋知好掛吊咧。子女个痛苦摆快樂佢感覺毋著，就連佢爸過身會兩年咧，佢也罕得想起，斯下把仔食飯時會問：「仰無喊若爸來共下食？」買東西分佢食時，佢會突然間講：「佢罈咧，這兜留分若爸食。」毋過，話一講忒，佢就毋記得咧。佢个心肝當痛，人敢愛到恁樣，正會放忒掛吊！

作者：張美容

☆詞彙學習☆

【怒忸】nid` nug`：突然受到驚嚇。

【張毋擘】zhong` m ciu`：裝不完。

【像種】ciong` zhung`：舉止行為像父母。

【拜幾】bai` gi`：星期幾。

【拖拉庫】to+ la ku`：卡車；源自日語之外來語。

【論日】nun+ ngid：整天。